



高士傳卷上

晉玄晏先生皇甫謐撰

被衣

被衣者堯時人也堯之師曰許由許由之師曰齧缺  
 齧缺之師曰王倪王倪之師曰被衣齧缺問道乎被  
 衣被衣曰若正汝形一汝視天和將至攝汝知一汝  
 度神將來舍德將為汝美道將為汝居汝瞳焉如新  
 生之犢而無求其故言未卒齧缺睡寐被衣大悅行  
 歌而去之曰形若槁骸心若死灰真其實知不以故  
 自持媒媒晦晦無心而不可與謀彼何人哉

王倪

王倪者堯時賢人也師被衣齧缺又學於王倪問道  
焉齧缺曰子知物之所同是乎曰吾惡乎知之子知  
子之所不知邪曰吾惡乎知之然則物無知邪曰吾  
惡乎知之雖然嘗試言之庸詎知吾所謂知之非不  
知邪庸詎知吾所謂不知之非知邪且吾嘗試問乎  
汝民濕寢則腰疾偏死鱮然乎哉木處則惴慄恂懼  
猿猴然乎哉三者孰知正處民食芻豢麋鹿食薦啣  
且甘帶鴟鴞者鼠四者孰知正味猿獼狙以爲雌麋  
與鹿交鱮與魚遊毛嬙麗姬人之所美也魚見之深

入鳥見之高飛麋鹿見之決驟四者孰知天下之正  
色哉自我觀之仁義之端是非之塗樊然殽亂吾惡  
能知其辯齧缺曰子不知利害則至人固不知利害  
乎王倪曰至人神矣大澤焚而不能熱河漢沍而不  
能寒疾雷破山風振海而不能驚若然者乘雲氣騎  
日月而遊乎四海之外死生無變於已而況利害之  
端乎

齧缺

齧缺者堯時人也許由師事齧缺堯又師由問於由  
曰齧缺可以配天乎吾藉王倪以要之許由曰殆哉

堦乎天下齧缺之爲人也聰明睿智給數以敏其性過人而又乃以人受天彼審乎禁過而不知過之所由生與之配天平彼且乘人而無天方且本身而異形方且尊知而火馳方且爲緒使方且爲物絃方且四顧而物應方且應衆宜方且與物化而未始有恒夫何足以配天平既而齧缺遇由曰子將何之曰將逃堯曰何謂也曰夫堯知賢人之利天下而不知其賊天下也遂逃不見

### 巢父

巢父者堯時隱人也山居不營世利年老以樹爲巢

而寢其上故時人號曰巢父堯之讓許由也由以告巢父巢父曰汝何不隱汝形藏汝光若非吾友也擊其膺而下之由悵然不自得乃過清泠之水洗其耳拭其目曰向聞貪言負吾之友矣遂去終身不相見

### 許由

許由字武仲陽城槐里人也爲人據義履方邪席不坐邪簋不食後隱於沛澤之中堯讓天下於許由曰日月出矣而燭火不息其於光也不亦難乎時雨降矣而猶浸灌其於澤也不亦勞乎夫子立而天下治而我猶尸之吾自視缺然請致天下許由曰子治天

下天下既已治也而我猶代子吾將爲名乎名者實  
之賓也吾將爲賓乎鷦鷯巢於深林不過一枝偃鼠  
飲河不過滿腹歸休乎君子無所用天下爲庖人雖  
不治庖尸祝不越樽俎而代之矣不受而逃去於是  
遁耕於中嶽潁水之陽箕山之下終身無經天下色  
堯又召爲九州長由不欲聞之洗耳於潁水濱時其  
友巢父牽犢欲飲之見由洗耳問其故對曰堯欲召  
我爲九州長惡聞其聲是故洗耳巢父曰子若處高  
岸深谷人道不通誰能見子子故浮游欲聞求其名  
譽汙吾犢口牽犢上流飲之一曰巢父聞由爲堯所

讓以爲汙乃臨池水以洗其耳池主怒曰何以汙我  
水由乃去宿於逆旅之家旦而遺其皮冠以行沒葬  
箕山之巔亦名許由山在陽城之南十餘里堯因就  
其墓號曰箕山公神以配食五嶽世世奉祀至今不  
絕也

### 善卷

善卷者古之賢人也堯聞其得道之士乃北面師之  
而問道焉及堯受終之後舜又以天下讓卷卷曰昔  
唐氏之有天下不教而民從之不賞而民勸之天下  
均平百姓安靜不知怨不知喜今子盛爲衣裳之服

以眩民目繁調五音之聲以亂民耳不作皇韶之樂以愚民心天下之亂從此始矣吾雖爲之其何益乎予立於宇宙之中冬衣皮毛夏衣絺葛春耕種形足以勞動秋收斂身足以休食日出而作日入而息逍遙於天地之間而心意自得吾何以天下爲哉悲夫子之不知予也遂不受去入深山莫知其處矣

### 壤父

壤父者堯時人也帝堯之世天下太和百姓無事壤父年八十餘而擊壤於道中觀者曰大哉帝之德也壤父曰吾日出而作日入而息鑿井而飲耕田而食

帝何德於我哉

### 石戶之農

石戶之農不知何許人也與舜爲友舜以天下讓石戶之農石戶之農曰捲捲乎后之爲人葆力之士也以舜之德爲未至於是夫負妻戴攜子以入海終身不反也

### 子州支伯

子州支伯即子州支父堯時人也堯以天下讓許由許由不受又讓於子州支父子州支父曰以我爲天子猶之可也雖然我適有幽憂之病方且治之未暇

治天下也至舜又以天下讓之亦對曰予適有幽憂之病方且治之未暇治天下也天下大器也而不以易生此有道者之所以異乎俗者也遂不知所之

蒲衣子

蒲衣子者舜時賢人也年八歲而舜師之齧缺問於王倪四問而四不知齧缺因躍而大喜行以告蒲衣子蒲衣子曰而乃今知之乎有虞氏不及泰氏有虞氏其猶藏仁以要人亦得人矣而未始出於非人泰氏其卧徐徐其覺于于一以已爲馬一以已爲牛其知情信其德甚真而夫始入於非人也後舜讓天下

於蒲衣子蒲衣子亦不受而去莫知所終

伯成子高

伯成子高者唐虞時諸侯也夏有天下乃去國而耕於野大禹聞之往趨而問以治天下之道伯成子高曰昔堯治天下至公無私不賞而民勸不罰而民威今子賞而不勸罰而不威德自此衰刑自此作夫子盍行乎無落吾事佶佶乎耕而不顧

商容

商容不知何許人也一曰殷時人武王入殷式商容閭即其人也  
有疾老子曰先生無遺教以告弟子乎

容曰將語子過故鄉而下車知之乎老子曰非謂不  
忘故耶容曰過喬木而趨知之乎老子曰非謂其敬  
老耶容張口曰吾舌存乎曰存曰吾齒存乎曰亡知  
之乎老子曰非謂其剛亡而弱存乎容曰嘻天下事  
盡矣

### 李耳

李耳字伯陽陳人也生於殷時爲周柱下史好養精  
氣貴接而不施轉爲守藏史積八十餘年史記云二  
百餘年時稱爲隱君子謚曰聃仲尼至周見老子知  
其聖人乃師之後周德衰乃乘青牛車去入大秦過

西關關令尹喜望氣先知焉乃物色遮候之已而老  
子果至乃強使著書作道德經五千餘言爲道家之  
宗以其年老故號其書爲老子老子居亳今亳州南  
宮有九龍井井前有昇仙檜老君鍊丹井井北有虛  
無堂石壁鐫道德經

### 庚桑楚

庚桑楚者楚人也老聃弟子偏得老聃之道以北居  
畏壘之山其居三年畏壘大壤畏壘之民相與言曰  
庚桑子之始來吾灑然異之今吾日計之而不足歲  
計之而有餘庶幾其聖人乎子胡不相與尸而祝之



社而稷之乎庚桑子聞之南面而不釋然弟子異之  
庚桑子曰弟子何異於予夫春氣發而百草生正得  
秋而萬寶成夫春與秋豈無得而然哉天道已行矣  
吾聞至人尸居環堵之室而百姓猖狂不知所如往  
今以畏壘之細民而竊竊焉欲俎豆予于賢人之間  
我其杓之人耶吾是以不釋於老聃之言

### 老萊子

老萊子者楚人也當時亂逃世耕於蒙山之陽莞葭  
爲墻蓬蒿爲室枝木爲牀著艾爲席飲水食菽墾山  
播種人或言於楚王王於是駕至萊子之門萊子方

織畚王曰守國之政孤願煩先生老萊子曰諾王去  
其妻樵還曰子許之乎老萊曰然妻曰妾聞之可食  
以酒肉者可隨而鞭捶可擬以官祿者可隨而鈇鉞  
妾不能爲人所制者妻投其畚而去老萊子亦隨其  
妻至於江南而止曰鳥獸之毛可績而衣其遺粒足  
食也仲尼嘗聞其論而感然改容焉著書十五篇言  
道家之用人莫知其所終也

### 小臣稷

小臣稷者齊人也抗厲希古桓公凡三往而不得見  
公歎曰吾聞布衣之士不輕爵祿則無以助萬乘之

主萬乘之主不好仁義則無以下布衣之士於是五  
往乃得見焉桓公以此能致士爲五霸之長

### 弦高

弦高者鄭人也鄭穆公時高見鄭爲秦晉所逼乃隱  
不仕爲商人及晉文公之返國也與秦穆公伐鄭圍  
其都鄭人私與秦盟而晉師退秦又使大夫杞子等  
三人戍鄭居三年晉文公卒襄公初立秦穆公方強  
使百里西乞白乙帥師襲鄭過周及滑鄭人不知時  
高將市于周遇之謂其友蹇佗曰師行數千里又數  
經諸侯之地其勢必襲鄭凡襲國者以無備也示以

知其情必不敢進矣於是乃矯鄭伯之命以十二牛  
犒秦師且使人告鄭爲備杞子奔齊逢孫揚孫奔宋  
孟明等返至殺晉人邀擊大破秦師鄭於是賴高而  
存鄭穆公以存國之賞賞高而高辭曰詐而得賞則  
鄭國之政廢矣爲國而無信是敗俗也賞一人而敗  
國俗智者不爲也遂以其屬徙東夷終身不返

### 江上丈人

江上丈人者楚人也楚平王以費無忌之讒殺伍奢  
奢子員亡將奔吳至江上欲渡無船而楚人購員甚  
急員恐不得脫見丈人方刺小船將漁員從而請渡

焉丈人渡之員甚德焉問其名族不肯告乃解佩劍以進丈人曰此千金之劍也願獻之丈人不受曰楚國之法得伍員者爵執圭金千鎰吾尚不取何用劍爲終辭不受員竟不知其誰至吳爲相求丈人不能得每食輒祭之曰名可得聞而形不可得見其惟江上丈人乎

### 披裘公

披裘公者吳人也延陵季子出遊見道中有遺金顧披裘公曰取彼金公投鎌瞋目拂手而言曰何子處之高而視之卑也五月披裘而負薪豈取金者哉季

子大驚旣謝而問姓名公曰吾子皮相之士何足語姓名也

### 林類

林類者魏人也年且百歲底春披裘拾遺穗於故畦並歌並進孔子適衛望之於野顧謂弟子曰彼叟可與言者試往訊之子貢請行逆之隴端面之而歎曰先生曾不悔乎而行歌拾穗林類行不留歌不輟子貢叩之不已乃仰而應曰吾何悔邪子貢曰先生少不勤行長不競時老無妻子死期將至亦有何樂而拾穗行歌乎林類笑曰吾之所以爲樂人皆有之而

反以爲憂少不勤行長不競時故能壽若此老無妻  
子死期將至故能樂若此子貢曰壽者人之情死者  
人之惡子以死爲樂何也林類曰死之與生一徃一  
反故死於是者安知不生於彼吾固知其不相若矣  
吾又安知營營而求生非惑乎亦又安知吾今之死  
不愈昔之生乎子貢聞之不喻其意還以告夫子夫  
子曰吾知其可與言果然

### 榮啓期

榮啓期者不知何許人也鹿裘帶索鼓琴而歌孔子  
遊于泰山見而問之曰先生何樂也對曰吾樂甚多

天生萬物唯人爲貴吾得爲人矣是一樂也男女之  
別男尊女卑故以男爲貴吾既得爲男矣是二樂也  
人生有不見日月不免襁褓者吾既已行年九十矣  
是三樂也貧者士之常也死者民之終也居常以待  
終何不樂也

### 荷蕢

荷蕢者衛人也避亂不仕自匿姓名孔子擊磬於衛  
乃荷蕢而過孔氏之門曰有心哉擊磬乎既而曰磬  
硜乎莫已知也斯已而已矣深則厲淺則揭孔子聞  
之曰果哉莫之難也

長沮桀溺

長沮桀溺者不知何許人也耦而耕孔子過之使子路問津焉長沮曰夫執輿者爲誰子路曰是孔子曰是魯孔丘與曰是也曰是知津矣問於桀溺曰子爲誰曰爲仲由曰是魯孔丘之徒與曰然曰滔滔者天下皆是也而誰以易之且而與其從避人之士豈若從避世之士哉耰而不輟子路以告孔子孔子憮然曰鳥獸不可與同群吾非斯人之徒而誰與天下有道丘不與易也

石門守

石門守者魯人也亦避世不仕自隱姓名爲魯守石門主晨夜開閉子路從孔子石門而宿問子路曰奚自子路曰自孔氏遂譏孔子曰是知其不可爲而爲之者與時人賢焉

陸通

陸通字接輿楚人也好養性躬耕以爲食楚昭王時通見楚政無常乃佯狂不仕故時人謂之楚狂孔子適楚楚狂接輿遊其門曰鳳兮鳳兮何德之衰也來世不可待往世不可追也天下有道聖人成焉天下無道聖人生焉方今之時僅免刑焉福輕乎羽莫之

知載禍重乎地莫之知避已乎已乎臨人以德殆乎  
殆乎畫地而趨迷陽迷陽無傷吾行吾行卻曲無傷  
吾足山木自寇也膏火自煎也桂可食故伐之漆可  
用故割之人皆知有用之用而莫知無用之用也孔  
子下車欲與之言趨而避之不得與之言楚王聞陸  
通賢遣使者持金百鎰車馬二駟往聘通曰王請先  
生治江南通笑而不應使者去妻從市來曰先生少  
而爲義豈老違之哉門外車跡何深也妾聞義士非  
禮不動妾事先生躬耕以自食親績以爲衣食飽衣  
暖其樂自足矣不如去之於是夫負金甌妻戴絰器

變名易姓游諸名山食桂櫨實服黃菁子隱蜀蛾眉  
山壽數百年

荷篠丈人

荷篠丈人不知何許人也孔子適楚子路從而後問  
曰子見夫子乎丈人曰四體不勤五穀不分孰爲夫  
子植其杖而芸子路拱而立止子路宿且享焉而見  
其二子明日子路行以告夫子曰隱者也使子路反  
見之至則行矣

曾參

曾參字子輿武城人也不仕而遊居於衛緼袍無表

顏色種噲手足胼胝三日不舉火十年不製衣曳絰而歌商頌天子不得臣諸侯不得友魯哀公賢之致邑焉參辭不受曰吾聞受人者常畏人與人者常驕人縱君不我驕我豈無畏乎終不受後卒于魯故養志者忘形養形者忘利致道者忘心矣

### 顏回

顏回字子淵魯人也孔子弟子貧而樂道退居陋巷曲肱而寢孔子曰回來家貧居卑胡不仕乎回對曰不願仕回有郭外之田五十畝足以給饘粥郭內之園十畝足以爲絲麻鼓琴宮商之音足以自娛習所

聞夫子之道足以自樂也回何仕焉孔子愀然變容曰善哉回之意也丘聞之知足者不以利自累也審於得者失之而不懼修於內者無位而不怍丘誦之久矣今於回而後見之

### 原憲

原憲字子思宋人也孔子弟子居魯環堵之室茨以生草蓬戶不完桑以爲樞而甕牖二室褐以爲塞上漏下濕匡坐而彈琴子貢相衛結駟連騎排藜藿入窮閭巷不容軒來見原憲原憲韋冠緹履杖藜而應門正冠則纓絕歛衽則肘見納履則踵決子貢曰嘻

先生何病也憲應之曰憲聞之無財謂之貧學道而不能行謂之病若憲貧也非病也夫希世而行比周而友學以爲人教以爲己仁義之慝車馬之飾憲不忍爲也子貢逡巡而有慚色終身耻其言之過也

### 漢陰丈人

漢陰丈人者楚人也子貢適楚過漢陰見丈人爲圃入井抱甕而灌用力甚多而見功寡子貢曰有機於此後重前輕挈水若抽其名爲槔用力寡而見功多丈人作色而笑曰聞之吾師有機械者必有機事有機事者必有機心機心存於胸中則純白不備純白

不備則神生不定神生不定者道之所不載也吾非不知羞而不爲也子貢愕然慚俯而不對有間丈人曰子奚爲者邪曰孔丘之徒也丈人曰子非夫博學以擬聖智獨絃歌以賣名聲於天下乎汝方將忘汝神氣墮汝形骸而何暇治天下乎子往矣勿妨吾事子貢卑陬失色頊頊然不自得行三十里而後愈

### 老商氏

老商氏者不知何許人也列禦寇師焉兼友伯高子而進于其道尹生聞之從列子居數月不省舍因問請蘄其術者十反而十不告尹生懟而請辭列子又



不命尹生退數月意不已又徃從之列子曰女何去  
來之頻尹生曰曩章戴有請於子子不我告固有憾  
於子今復脫然是以又來列子曰曩吾以汝爲達今  
汝之鄙至此乎姬將告汝所學於夫子者矣自吾之  
學也三年之後心不敢念是非口不敢言利害始得  
老商一盼而已五年之後心庚念是非口庚言利害  
老商始一解顏而笑七年之後從心之所念庚無是  
非從口之所言庚無利害老商始一引吾並席而坐  
今女居先生之門曾未洽時履虛乘風其可得乎

### 列禦寇

列禦寇者鄭人也隱居不仕鄭穆公時子陽爲相專  
任刑法列禦寇乃絕迹窮巷面有飢色或告子陽曰  
列禦寇蓋有道之士也居君之國而窮君無乃爲不  
好士乎子陽聞而悟使官載粟數十乘而與之禦寇  
出見使者再拜而辭之入見其妻妻望之而拊心曰  
妾聞爲有道之妻子皆得佚樂今有飢色君過而遺  
先生食先生不受豈非命也哉禦寇笑曰君非自知  
我也以人之言而遺我粟至其罪我也又且以人之  
言此吾所以不受也居一年鄭人殺子陽其黨皆死  
禦寇安然獨全終身不仕著書八篇言道家之意號

曰列子

壺丘子林

壺丘子林者鄭人也道德甚優列禦寇師事之初禦寇好游壺丘子曰禦寇好游游何所好列子曰游之樂所玩無故人之游也觀其所見我之游也觀其所變壺丘子曰禦寇之游固與人同而曰固與人異凡所見亦恒見其變玩彼物之無物不知我亦無故務外游不知務內觀外游者求備於物內觀者取足於身取足於身游之至也求備於物游之不至也於是列子自以為不知游將終身不出居鄭圃四十年人

無識者

莊周

莊周者宋之蒙人也少學老子為蒙縣漆園吏遂遺世自放不仕王公大人皆不得而器之楚威王使大夫以百金聘周周方釣於濮水之上持竿不顧曰吾聞楚有神龜死二千歲矣巾笥而藏之於廟堂之上此龜寧無為留骨而貴乎寧生曳尾塗中乎大夫曰寧掉尾塗中耳莊子曰往矣吾方掉尾於塗中後又以千金之幣迎周為相周曰子不見郊祭之犧牛乎衣以文繡食以芻菽及其牽入太廟欲為孤豚其可

得乎遂終身不仕

### 段干木

段干木者晉人也少貧且賤心志不遂乃治清節遊西河師事卜子夏與田子方李克翟璜吳起等居于魏皆爲將唯干木守道不仕魏文侯欲見就造其門段干木踰墻而避文侯文侯以客禮待之出過其廬而軾其僕問曰干木布衣也君軾其廬不已甚乎文侯曰段干木賢者也不以勢利懷君子之道隱處窮巷聲馳千里吾敢不軾乎干木先乎德寡人先乎勢干木富乎義寡人富乎財勢不若德貴財不若義高

又請爲相不肯後卑已固請見與語文侯立倦不敢息夫文侯名過齊桓公者蓋能尊段干木敬卜子夏友田子方故也

### 公儀潛

公儀潛者魯人也與子思爲友穆公因子思而致命欲以爲相子思曰公儀子此所以不至也君若飢渴待賢納用其謀雖蔬食飲水仍亦願在下風如以高官厚祿爲釣餌而無信用之心公儀子智若魯者可也不爾則不踰君之庭且臣不佞必不能爲君操竿下釣以傷守節之士潛竟終身不屈

東郭順子

東郭順子者魏人也修道守真田子方師事之而爲  
魏文侯師友侍坐於文侯數稱谿工文侯曰谿工子  
之師耶子方曰非也無擇之里人也稱道數當故無  
擇稱之文侯曰然則子無師耶子方曰有文侯曰子  
師誰耶子方曰東郭順子也文侯曰然則夫子何故  
未常稱之子方曰其爲人也真人貌而天虛緣而葆  
真清而容物物無道則正容以悟之使人之意也消  
無擇何足以稱之子方出文侯曰遠哉全德之君子  
始吾以聖智之言仁義之行爲至矣吾聞子方之師

吾形解而不欲動口鉗而不欲言吾所學者真土梗  
耳夫魏真爲我累耳

顏觸

顏觸齊人也宣王見之王曰觸前觸亦曰王前宣王  
不說左右曰王人君也觸人臣也王曰觸前觸亦曰  
王前可乎觸對曰夫觸前爲慕勢王前爲趨士與使  
觸爲慕勢不如使王爲趨士王忿然作色曰王者貴  
乎士貴乎對曰士貴耳王者不貴王曰有說乎觸曰  
有昔者秦攻齊令曰有敢去柳下季壟五十步而樵  
採者死不赦令曰有能得齊王頭者封萬戶侯賜金

千鎰由是觀之生王之頭曾不若死士之壘也宣王繼曰顏先生與寡人遊食太牢乘安車妻子衣服麗都顏觸辭去曰觸願得歸晚食以當肉安步以當車無罪以當貴清淨真正以自虞遂辭而去

### 王斗

王斗者齊人也修道不仕與顏歆並時曾造齊宣王門欲見宣王宣王使謁者延斗入斗曰斗趨見王爲好勢王趨見斗爲好士於王何如謁者還報王曰先生徐之寡人請從王趨而迎之於門曰寡人奉先君之宗廟守社稷聞先生直言正諫不諱斗曰王之憂

國愛民不若王之愛尺穀也王曰何謂也斗曰王使人爲冠不使左右便辟而使工者何也爲能之也今王治齊國非左右便辟則無使也臣故曰不如愛尺穀也王起謝曰寡人有罪於國家矣於是舉士五人任之以官齊國大治王斗之力也

### 黔婁先生

黔婁先生者齊人也修身清節不求進于諸侯魯恭公聞其賢遣使致禮賜粟三千鍾欲以爲相辭不受齊王又禮之以黃金百斤聘爲卿又不就著書四篇言道家之務號黔婁子終身不屈以壽終黔婁先生

卒曾西來弔見尸在牖下覆以布被手足不蓋覆頭則足見覆足則頭見西曰斜其被則斂矣妻曰斜之有餘不若正之不足先生以不邪之故至於此生而不邪死而邪之非先生之志也西曰先生之終以何為謚妻曰以康為謚西曰先生存時食不充口衣不蓋形死則手足不斂何樂於此而謚為康乎妻曰昔先生君欲用為國相而辭不為是有餘貴也君嘗賜粟三千鍾辭而不受是有餘富也其謚為康不亦宜乎

### 陳仲子

陳仲子者齊人也其兄戴為齊卿食祿萬鍾仲子以為不義將妻子適楚居於陵自謂於陵仲子窮不苟求不義之食不食遭歲飢乏糧三日乃匍匐而食井上李實之蟲者三咽而能視身自織履妻擘繡以易衣食楚王聞其賢欲以為相遣使持金百鎰至於陵聘仲子仲子入謂妻曰楚王欲以我為相今日為相明日結駟連騎食方丈於前意可乎妻曰夫子左琴右書樂在其中矣結駟連騎所安不過容膝食方丈於前所甘不過一肉今以容膝之安一肉之味而懷楚國之憂亂世多害恐先生不保命也於是出謝使

者遂相與逃去爲人灌園

### 漁父

漁父者楚人也楚亂乃匿名隱釣於江濱楚頃襄王時屈原爲三閭大夫名顯於諸侯爲上官靳尚所譖王怒放之江濱被髮行吟於澤畔漁父見而問之曰子非三閭大夫與何故至斯原曰舉世混濁而我獨清衆人皆醉而我獨醒是以見放漁父曰夫聖人不凝滯於萬物故能與世推移舉世混濁何不揚其波汨其泥衆人皆醉何不舖其糟歎其醜何故懷瑾握瑜自令放爲乃歌曰滄浪之水清可以濯吾纓滄浪

之水濁可以濯吾足遂去深山自閉匿人莫知焉

### 吾丘先生

吾丘先生齊人也宣王獵于社山社山父老十三人相與勞王王賜父老不租父老皆前謝王吾丘先生獨不謝王問先生何以不謝對曰願得壽得富得貴王曰何如對曰夫選良吏平法度則臣得壽矣振之以時則臣得富矣令少敬長則臣得貴矣

### 河上丈人

河上丈人者不知何國人也明老子之術自匿姓名居河之濱著老子章句故世號曰河上丈人當戰國

之末諸侯交爭馳說之士咸以權勢相傾唯丈人隱身修道老而不虧傳業於安期生著老子章句爲道家之宗焉

### 安期生

安期生者琅琊人也受學河上丈人賣藥海邊老而不仕時人謂之千歲公秦始皇東遊請見與語三日三夜賜金璧值數千萬出置阜鄉亭而去以赤玉舄一雙爲報留書與始皇曰後數年求我於蓬萊山下及秦敗安期生與其友蒯通往見項羽羽欲封之卒不肯受

### 黃石公

黃石公者下邳人也遭秦亂自隱姓名時人莫知者初張良易姓爲長自匿下邳步游沂水圯上有一老父衣褐至良所墜其履圯下顧謂良曰孺子下取履良素不知公愕然欲毆之爲其老人也強忍下取履因跪進焉公笑以足受之而去良殊驚公行里所還謂良曰孺子可教也後五日平旦良往公怒曰與老人期何後之復跪曰諾五日平旦良往公怒曰與老人期何後也後五日早會良雞鳴往公又先在復怒曰何後也後五日早會良夜半往有頃公亦至喜曰當如是乃



出一編書與良曰讀是則爲王者師矣良問其姓名  
不荅曰後十三年孺子見濟北穀城山下黃石即我  
矣於是稱爲黃石公也遂去不見良旦視其書乃太  
公兵法良異之因講習以說他人皆不能用後與沛  
公遇於陳留沛公用其言輒有功後十三年從高祖  
過濟北穀城山下得黃石良乃寶祠之及良死與石  
并葬焉

高士傳卷上

